

Amran Yahya  
am@hmetro.com.my

**Kuala Pilah**

**K**eenikan namanya, Isnin Puasa pasti menarik perhatian ramai apabila umat Islam menyambut Ramadan bermula hari ini.

Bagi Isnin, 74, nama diberi arwah bapanya, Puasa Sabtu gelaran yang cukup istimewa dan secara kebetulan umat Islam berpuasa pada hari Isnin tahun ini.

Peneroka Felda itu berkata, nama Isnin tidak pelik, namun apabila digabungkan dengan nama bapanya, Puasa, ia menjadi unik.

"Secara kebetulan kita berpuasa esok (Isnin) dan kesempatan ini saya mengucapkan selamat berpuasa," katanya di rumahnya di Felda Kepis, semalam.

Katanya, sepanjang hayat arwah bapanya tidak pernah menceritakan sebab nama itu diberikan.

"Saya anggap nama ini istimewa. Sewaktu di bangku sekolah, kawan sering menyakat dan menjadikan nama saya bahan jenaka, tetapi saya tidak ambil hati.

"Ada juga penduduk di Felda ini menyakat supaya berpuasa pada Isnin ini tetapi saya hanya tersenyum," katanya yang berasal dari Alai, Melaka dan menetap di Felda itu sejak 1982.

Dia yang ditemani isteri, Mariah Ibrahim, 64, berkata, datuk sebelah bapanya bernama Sabtu dan jika digabungkan menjadi Isnin bin Puasa bin Sabtu.

# 'Nama saya Isnin Puasa'

■ Lelaki miliki nama unik tarik perhatian hari pertama sambut Ramadan

"Saya Isnin Puasa manakala arwah bapa Puasa Sabtu," katanya yang memiliki ibu bernama Pon Jambol.

Menurutnya, dia beberapa kali merayakan Ramadan dan berpuasa pada Isnin serta kali terakhir pada 6 Jun 2016.

Sementara itu, Mariah berkata, individu menggunakan nama hari seperti Ahad, Isnin, Khamis, Jumaat dan Sabtu sesuatu yang tidak asing di kampung halamannya di Durian Tunggal, Melaka.

"Ketika mengenali suami, saya tidak rasa namanya pelik berbanding orang kebanyakan," katanya yang memiliki tujuh anak berusia 23 hingga 42 tahun.

Dalam pada itu, Pensyarah Kanan Fakulti Bahasa dan Komunikasi, Universiti Pendidikan Sultan Idris (UPSI), Profesor Madya Datuk Paduka Dr Mohd Rosli Saludin berkata, kebanyakan masyarakat dahulu taasub menggunakan alam semula jadi sebagai nama.


Katanya, ada yang menggunakan nama tumbuhan, persekitaran, objek dan hari sebagai gelaran diri.

"Nama Isnin dan Puasa gabungan nama hari dan bulan. Ia mungkin diilhamkan ketika kelahiran pada waktu berkenaan.

"Namun zaman berubah dan masyarakat kini gemar meletakkan nama anak mengikut budaya asing selain memilih nama daripada kitab yang mempunyai maksud tersendiri," katanya.

Beliau berkata, jika nama dahulu dikekalkan, generasi muda mungkin beranggapan individu berkenaan ketinggalan zaman.

**"Saya Isnin Puasa manakala arwah bapa Puasa Sabtu Isnin"**



ISNIN bersama anak dan cucunya.